



მოგესალმებით,

ეროვნული ბანკი მონეტარული პოლიტიკის მორიგ ანგარიშს წარმოგიდგენთ, რომელშიც დეტალურად არის წარმოდგენილი ჩვენი პროგნოზები და მიმდინარე მაკროეკონომიკური მდგომარეობის ანალიზი. ანგარიშში ასევე ამომწურავად არის ახსნილი მონეტარული პოლიტიკის მიმდინარე გადაწყვეტილების მიზეზები.

ინფლაცია დღეს გლობალური გამოწვევაა. COVID-19 პანდემიის შედეგად მიღებულ ეკონომიკურ ზარალთან ერთად, რუსეთის უკრაინაში შეჭრამ გლობალური ეკონომიკური ზრდის პერსპექტივები მნიშვნელოვნად გააუარესა და მსოფლიო ახალი გამოწვევების წინაშე დააყენა, რომელთა შორის ერთ-ერთი ყველაზე მწვავე სასაქონლო ბაზრებზე ფასების ზრდაა. ბოლო პერიოდში გარკვეული სტაბილიზაციის მიუხედავად, მსოფლიო სასაქონლო ბაზრებზე ფასები კვლავ მაღალ დონეზე ნარჩუნდება, რაც მსოფლიოში და, მათ შორის, საქართველოში მაღალი ინფლაციის მნიშვნელოვანი მიზეზია.

საქართველოში ინფლაციამ პიკი გადალახა და შემცირების ტენდენცია აქვს, რაც მეტწილად იმპორტირებული საქონლის ინფლაციის კლებას უკავშირდება. მიუხედავად აღნიშნული კლებისა, მთლიანი ინფლაცია კვლავ მაღალ დონეზეა. 2022 წლის სექტემბერში სამომხმარებლო ფასების საერთო დონე წლიურად 11.5%-ით გაიზარდა, ხოლო საბაზო ინფლაცია, რომელიც სამომხმარებლო კალათიდან მაღალი მერყეობით გამორჩეულ სურსათის, ენერგომატარებლების და სიგარეტის ფასებს გამორიცხავს, მთლიან ინფლაციაზე ნაკლებია და 7.5%-ს შეადგენს.

ამის პარალელურად, ეკონომიკური აქტივობა საქართველოში მაღალია, რასაც, დიდწილად ომის ფონზე, რუსეთისა და ბელარუსის მოქალაქეების დიდი რაოდენობით შემოდინება და, შესაბამისად, მიგრანტების ადგილობრივი ხარჯები და, ასევე, ტურიზმის ეტაპობრივი აღდგენა უწყობს ხელს. წინასწარი მონაცემებით, 2022 წლის იანვარ-აგვისტოში ეკონომიკურმა ზრდამ 10.3% შეადგინა. მიმდინარე ტენდენციებიდან გამომდინარე, ეროვნულმა ბანკმა 2022 წლის ეკონომიკური ზრდის პროგნოზი 10%-მდე გაზარდა და ზრდის მთავარი მამოძრავებელი ძლიერი შიდა მოთხოვნა და აღდგენილი ტურიზმი იქნება.

ჩვენი შეფასებით, 2022 წლის საშუალო ეკონომიკური აქტივობის დონე ეკონომიკის ჯამური წარმოების პოტენციალს აჭარბებს, რაც დამატებით ინფლაციურ რისკებს წარმოქმნის. ინფლაციურ რისკებს ის ფაქტიც ამწვავებს, რომ ერთმანეთის მიმყოლი შოკების ფონზე ინფლაცია მისი მიზნობრივი მაჩვენებლიდან ხანგრძლივად არის გადახრილი. სწორედ ამ მიზეზების გამო, ეროვნული ბანკის პოლიტიკა გამკაცრებულია.

მაღალინფლაციური გარემოს პირობებში ჩვენ ინფლაციის შემცირებაზე ფოკუსირებული ვრჩებით და გამკაცრებულ მონეტარულ პოლიტიკას ვინარჩუნებთ. ეროვნულმა ბანკმა 26 ოქტომბრის სხდომაზე მონეტარული პოლიტიკის განაკვეთი უცვლელად, 11%-ზე, დატოვა. გამკაცრებული მონეტარული პოლიტიკა და ბოლო პერიოდში გატარებული მაკროპრუდენციული ზომები ინფლაციას საშუალოვადიან პერიოდში 3%-იან სამიზნე მაჩვენებელთან დააბრუნებს. არსებული ინფლაციური რისკების გათვალისწინებით, მკაცრ მონეტარულ პოლიტიკას შევინარჩუნებთ და, სამომავლოდ, მისი ნორმალიზაცია ეტაპობრივად და მხოლოდ მას შემდეგ დაიწყება, რაც ინფლაციის შემცირებას გამოკვეთილი ტრენდი ექნება. წლიური ინფლაცია მოკლევადიანად მაღალ დონეზე შენარჩუნდება, შემდეგ ეტაპობრივად შემცირებას დაიწყებს და, გამკაცრებული მონეტარული პოლიტიკისა და ინფლაციური შოკების ამოწურვის შედეგად, მის სამიზნე 3%-იან მაჩვენებელს 2023 წლის მეორე ნახევარიდან დაუახლოვდება.

გასათვალისწინებელია, რომ მონეტარული პოლიტიკის განაკვეთის პროგნოზი მონეტარული პოლიტიკის მომავალ გადაწყვეტილებებთან დაკავშირებით ეროვნული ბანკის დაპირება არ არის. ის, დღევანდელი ვითარებიდან გამომდინარე, მონეტარული პოლიტიკის განაკვეთის საორიენტაციო ტრაექტორიას ასახავს. გლობალურად გაურკვევლობა მაღალია, მსოფლიო ეკონომიკის ახალი მოვლენების განვითარებასთან ერთად, გლობალური ეკონომიკური მდგომარეობა იცვლება და ეროვნული ბანკის მიერ პოლიტიკის გაანალიზება ხელახლა ხდება, რაც საპროგნოზო მაკროეკონომიკურ მაჩვენებლებსა და, შესაბამისად, ეროვნული ბანკის მომავალ გადაწყვეტილებებზეც ახდენს გავლენას.

საქართველოს ეროვნული ბანკი მუდმივად აკვირდება ეკონომიკურ ტენდენციებს, მათი ანალიზის საფუძველზე პროგნოზებს აახლებს და დაინტერესებულ საზოგადოებას მონეტარული პოლიტიკის განახლებულ ანგარიშს წარუდგენს.

გმადლობთ ყურადღებისათვის!